



Jadual Pembacaan Khutbah Jumaat

Siri 1/ 2024 (Januari Tahun 2024)

تاريخ	تاجوق	ب
5 Januari 2024M/ 23 Jamadil Akhir 1445H	Menginsafi Fitrah Penuaan	1.
12 Januari 2024M/ 30 Jamadil Akhir 1445H	Impian Yang Tidak Kesampaian	2.
19 Januari 2024M/ 7 Rejab 1445H	Pemberian Yang Dikhianati	3.
26 Januari 2024M/ 14 Rejab 1445H	Derma Organ: Erti Sebuah Kehidupan	4.
Khutbah Kedua		

دبىاءى:



زكاة فولاو فينغ

دترىتن:



جابتن حال إحوال اكام اسلام فولاو فينغ



Menginsafi Fitrah Penuaan

5 Januari 2024M/ 23 Jamadil Akhir 1445H

الْحَمْدُ لِلَّهِ الَّذِي خَلَقَ الْخَلَائِقَ وَحَدَّدَ أَعْمَارَهَا وَآجَالَهَا، وَقَدَّرَ أَقْوَاتَهَا
وَأَرْزَاقَهَا، نَحْمَدُهُ سُبْحَانَهُ وَتَعَالَى وَنَشْكُرُهُ وَنَتُوبُ إِلَيْهِ وَنَسْتَغْفِرُهُ.

وَنَشْهَدُ أَنْ لَا إِلَهَ إِلَّا اللَّهُ وَحْدَهُ لَا شَرِيكَ لَهُ، وَأَنَّ مُحَمَّدًا عَبْدُهُ وَرَسُولُهُ.

صَلَّى اللَّهُ عَلَى سَيِّدِنَا مُحَمَّدٍ وَعَلَى آلِهِ وَأَصْحَابِهِ، وَالتَّابِعِينَ وَتَابِعِيهِمْ
بِإِحْسَانٍ إِلَى يَوْمِ الدِّينِ.

أَمَّا بَعْدُ; فَاتَّقُوا اللَّهَ - عِبَادَ اللَّهِ - فَقَدْ نَجَا مَنْ اتَّقَى، وَضَلَّ مَنْ قَادَهُ الْهَوَى:
يَا أَيُّهَا الَّذِينَ ءَامَنُوا اتَّقُوا اللَّهَ حَقَّ تُقَاتِهِ وَلَا تَمُوتُنَّ إِلَّا وَأَنْتُمْ مُسْلِمُونَ ﴿١٠٣﴾

SIDANG JUMAAT YANG DIRAHMATI ALLAH SEKALIAN,

Saya berpesan kepada diri saya dan menyeru sidang Jumaat yang dikasihi. Marilah kita meningkatkan keimanan dan ketakwaan ke hadrat Allah سُبْحَانَهُ وَتَعَالَى dengan mentaati segala perintah-Nya dan menjauhi segala larangan-Nya. Mudah-mudahan kita tergolong sebagai hamba Allah yang terbaik, beroleh kejayaan di dunia dan di akhirat.



Di samping itu, khatib ingin mengingatkan sidang Jumaat sekalian agar memberikan fokus dan mendengar serta menghayati khutbah Jumaat ini serta tidak bercakap-cakap atau leka bermain gajet kerana ia boleh mencacatkan pahala Jumaat.

Islam merupakan sebuah agama yang sarat dengan adab, kesantunan, akhlak serta nilai-nilai murni yang mengajar erti belas kasihan dan kasih sayang sesama insan. Seajar dengan nilai-nilai tersebut, keutamaan yang ditekankan dalam Islam adalah mengutamakan mereka yang lebih berusia. Oleh itu, khutbah pada hari ini akan membincangkan tajuk: **Menginsafi Fitrah Penuaan.**

MUSLIMIN YANG DIKASIHI SEKALIAN,

Hakikat penuaan adalah satu kitaran hidup secara fitrah yang ditentukan oleh Allah سُبْحَانَهُ وَتَعَالَى, bermula dari janin, bayi, orang muda, dewasa sehingga di usia tua. Firman Allah سُبْحَانَهُ وَتَعَالَى dalam surah al-Ghafir, ayat 67:

هُوَ الَّذِي خَلَقَكُمْ مِنْ تُرَابٍ ثُمَّ مِنْ نُطْفَةٍ ثُمَّ مِنْ عَلَقَةٍ ثُمَّ يُخْرِجُكُمْ طِفْلًا ثُمَّ لِتَبْلُغُوا أَشَدَّكُمْ ثُمَّ لِتَكُونُوا شُيُوخًا وَمِنْكُمْ مَنْ يُتَوَفَّى مِنْ قَبْلٍ وَلِتَبْلُغُوا أَجَلًا مُّسَمًّى وَلَعَلَّكُمْ تَعْقِلُونَ ﴿٦٧﴾

Maksudnya: “Dialah yang mencipta kamu daripada tanah, kemudian daripada setitis air benih, kemudian daripada segumpal darah beku.

Kemudian daripada seketul daging, kemudian dipelihara kamu (membesar) sehingga dewasa, lalu (dipanjangkan umur) hingga dimatikan sebelum itu, (Allah melakukan yang demikian) agar kamu sampai kepada masa yang ditentukan (untuk menerima balasan) dan agar kamu berfikir.”

Allah ﷻ telah menentukan ajal sejak azali, maka membuat persediaan untuk menghadapinya adalah sesuatu yang amat perlu diberi perhatian kerana setiap kehidupan akan berakhir dengan kematian. Firman Allah di dalam surah al-Mukminun, ayat 15:

ثُمَّ إِنَّكُمْ بَعْدَ ذَلِكَ لَمَيِّتُونَ ﴿١٥﴾

Maksudnya: “Kemudian, sesungguhnya kamu pasti akan mati.”

Justeru, kita haruslah cakna terhadap penuaan serta golongan warga emas dengan memastikan proses penuaan berada dalam keadaan positif dan produktif sehingga mencapai pengakhiran yang terbaik. Ini dapat dicapai menerusi penjagaan terhadap hak asasi manusia untuk menikmati kesejahteraan, dihormati, hidup dengan bermaruah dan penuh kemuliaan, serta mampu menyumbang kepada pembangunan negara.

SIDANG JUMAAT YANG DIRAHMATI ALLAH,

Penuaan penduduk adalah isu global, termasuklah Malaysia, yang terjadi disebabkan peningkatan jangka hayat dan penurunan kadar kesuburan. Impaknya terhadap negara bergantung kepada sejauh mana negara itu bersedia untuk menghadapinya.

Warga emas di Malaysia ditakrifkan sebagai mana-mana individu yang berumur 60 tahun dan ke atas. Unjuran Pertubuhan Bangsa-bangsa Bersatu (PBB) melihat Malaysia bakal menjadi sebuah negara tua pada tahun 2030 apabila penduduk berumur 60 tahun dan ke atas mencapai 15 peratus daripada jumlah penduduk negara.

Melihat statistik ini, kita harus sedar risiko yang bakal melanda negara sekiranya isu ini tidak ditangani segera. Antara akibatnya, kesukaran warga emas untuk meneruskan kehidupan lanjut usia oleh sebab aspek kemudahan awam yang terhad dan tidak mencukupi seperti akses kepada kesihatan, pendapatan dan kewangan, penyertaan sosial dan juga keselamatan nyawa.

MUSLIMIN YANG DIRAHMATI ALLAH SEKALIAN,

Hak dan tanggungjawab pemimpin serta peranan masyarakat terhadap golongan warga emas perlu dipenuhi. Mereka harus dilindungi dari segala bentuk pengabaian, diskriminasi dan penganiayaan, selaras dengan perkara 8 Perlembagaan Persekutuan yang memperuntukkan “Semua orang adalah sama di sisi undang-undang dan berhak mendapat perlindungan yang sama rata di sisi undang-undang”.

Selain itu, peranan dan tanggungjawab anak-anak dalam menghormati dan menjaga kedua orang tua mereka juga perlu dititik beratkan. Ini kerana Rasulullah ﷺ telah mengajar umat manusia untuk sentiasa berbakti dan berbuat baik kepada ibu dan bapa selagi mana

mereka masih hidup. Rasulullah ﷺ telah bersabda yang bermaksud:

“Hina, hina, hina.” Baginda ditanya: “Siapa (yang engkau maksudkan) wahai Rasulullah?” Rasulullah menjawab: “Siapa sahaja yang mempunyai orang tuanya ketika sudah lanjut usia, salah seorang atau kedua namun tidak (menjadikan sebab) masuk syurga.” ﴿Hadis Riwayat Muslim﴾

Berdasarkan hadis yang dinyatakan, sesungguhnya sesiapa yang tidak memanfaatkan kelebihan tersebut, gagal dalam menguruskan ibu dan bapa mereka sehingga tidak membolehkan masuk ke syurga, maka mereka termasuk dalam kalangan orang yang hina.

Dalam perkembangan terbaru, Malaysia kini dalam proses Penggubalan Rang Undang-undang (RUU) Warga Emas yang bertujuan melindungi warga emas yang dijangka akan dibentangkan untuk bacaan kali pertama di Dewan Rakyat pada tahun 2024. Antara cadangan yang terkandung dalam RUU tersebut adalah melindungi kebajikan dan hak asasi warga emas.

MUSLIMIN YANG DIRAHMATI ALLAH SEKALIAN,

Dari sudut Islam, pendekatan Maqasid Syariah (مَقَاصِدُ شَرْعِيَّةٍ) boleh dijadikan sebagai panduan dalam pengurusan warga emas khususnya kepada pengurus institusi yang mempunyai kaitan dengan penjagaan warga emas. Infrastruktur dan persekitaran yang selesa merupakan elemen penting dalam memenuhi keperluan asasi warga emas selain keperluan

fizikal. Begitu juga keperluan untuk mengambil berat dalam menambah ilmu pengetahuan dan amalan-amalan berkaitan keagamaan yang kesannya akan memberikan kebaikan kepada jiwa dan roh. Di samping itu dapat memanfaatkan usia tua dengan meningkatkan ketakwaan dan keimanan kepada Allah **سُبْحَانَهُ وَتَعَالَى**.

Daripada Abi Bakrah **رَضِيَ اللَّهُ عَنْهُ** beliau berkata, telah datang seorang lelaki kepada Rasulullah **صَلَّى اللَّهُ عَلَيْهِ وَسَلَّمَ** lalu bertanya: “Wahai Rasulullah, siapakah manusia yang terbaik? ” Rasulullah menjawab:

مَنْ طَالَ عُمُرُهُ وَحَسَنَ عَمَلُهُ

Maksudnya: “*Siapa yang panjang usianya dan baik amalannya*”.

﴿Hadis Riwayat At Tirmizi﴾

SIDANG JUMAAT YANG DIRAHMATI ALLAH,

Mengambil semangat tahun baru 2024 ini, mimbar berpesan supaya kita bersama-sama meningkatkan kesedaran dan kesediaan untuk menghadapi penuaan di samping prihatin dalam menyediakan sokongan, bantuan dan kemudahan serta melindungi hak dan tanggungjawab secara saksama kepada warga emas.

Kesimpulan daripada khutbah hari ini ialah:



Pertama: Umat Islam perlu bersiap sedia menghadapi penuaan seawal bermulanya kehidupan kerana setiap kehidupan akan berakhir dengan kematian.

Kedua: Hak asasi golongan warga emas perlu dilindungi daripada sebarang bentuk pengabaian, diskriminasi dan penganiayaan.

Ketiga: Menggunakan pendekatan maqasid syariah (مَقَاصِدُ شَرْعِيَّةٌ) sebagai rujukan dalam pengurusan institusi berkaitan warga emas.

Firman Allah dalam surah al-Hajj ayat 5:

... وَمِنْكُمْ مَّنْ يُتَوَقَّى وَمِنْكُمْ مَّنْ يُرُدُّ إِلَى أَرْدَلِ الْعُمْرِ لِكَيْلَا يَعْلَمَ مِنْ بَعْدِ عِلْمٍ شَيْئًا

وَتَرَى الْأَرْضَ هَامِدَةً فَإِذَا أَنْزَلْنَا عَلَيْهَا الْمَاءَ اهْتَزَّتْ وَرَبَتْ وَأَنْبَتَتْ مِنْ كُلِّ زَوْجٍ بَهِيجٍ ﴿٥﴾

Maksudnya: "...dan (dalam pada itu) ada antara kamu yang dimatikan (semasa kecil atau semasa dewasa) serta ada pula antara kamu yang dipanjangkan umurnya sampai nyanyuk, supaya dia tidak mengetahui lagi sesuatu pun yang dahulunya telah diketahuinya. Ingatlah satu bukti lagi (tatkala) kamu lihat bumi ini kering, kemudian apabila Kami telah turunkan air (hujan) di atasnya, maka hiduplah bumi itu menjadi subur dan ia menumbuhkan berbagai-bagai jenis pasangan tumbuhan yang indah."

بَارَكَ اللَّهُ لِي وَلَكُمْ فِي الْقُرْآنِ الْعَظِيمِ، وَنَفَعَنِي وَإِيَّاكُمْ بِهَدْيِ سَيِّدِ الْمُرْسَلِينَ، أَقُولُ
مَا سَمِعْتُمْ، وَأَسْتَغْفِرُ اللَّهَ لِي وَلَكُمْ، وَلِسَائِرِ الْمُسْلِمِينَ مِنْ كُلِّ ذَنْبٍ، فَاسْتَغْفِرُوهُ،
إِنَّهُ هُوَ الْغَفُورُ الرَّحِيمُ.



Khutbah Kedua Bulan Januari

2024M/ 1445H

الْحَمْدُ لِلَّهِ عَلَى آلَائِهِ وَإِحْسَانِهِ، وَالشُّكْرُ لَهُ عَلَى تَوْفِيقِهِ وَامْتِنَانِهِ،
وَأَشْهَدُ أَنْ لَا إِلَهَ إِلَّا اللَّهُ وَحْدَهُ لَا شَرِيكَ لَهُ تَعْظِيمًا لِحُجَّتِهِ،
وَأَشْهَدُ أَنَّ مُحَمَّدًا عَبْدُهُ وَرَسُولُهُ دَاعِيًا إِلَى رِضْوَانِهِ.
صَلَّى اللَّهُ وَسَلَّم عَلَى سَيِّدِنَا مُحَمَّدٍ وَعَلَى آلِهِ وَصَحْبِهِ، عَدَدَ خَلْقِهِ وَرِضَا نَفْسِهِ،
وَزِنَةَ عَرْشِهِ وَمِدَادَ كَلِمَاتِهِ.
أَمَّا بَعْدُ، فَيَا عِبَادَ اللَّهِ، اتَّقُوا اللَّهَ تَعَالَى رَبَّكُمْ حَقَّ تَقَاتِهِ، وَاعْمَلُوا بِطَاعَتِهِ وَمَرْضَاتِهِ،
ثُمَّ اْعْلَمُوا أَنَّ اللَّهَ سُبْحَانَهُ وَتَعَالَى أَمْرُكُمْ بِأَمْرٍ بَدَأَ فِيهِ بِنَفْسِهِ؛ فَقَالَ عَلِيمًا حَكِيمًا:
إِنَّ اللَّهَ وَمَلَائِكَتَهُ يُصَلُّونَ عَلَى النَّبِيِّ يَا أَيُّهَا الَّذِينَ ءَامَنُوا صَلُّوا عَلَيْهِ وَسَلِّمُوا تَسْلِيمًا ﴿٥٦﴾
[الأحزاب: 56]

اللَّهُمَّ صَلِّ وَسَلَّم عَلَى عَبْدِكَ وَرَسُولِكَ مُحَمَّدٍ نَبِيِّ الْبَشِيرِ النَّذِيرِ، وَالسَّرَاجِ الْمُنِيرِ،
وَارْضَ اللَّهُمَّ عَنْ آلِهِ وَصَحَابَتِهِ أَجْمَعِينَ، وَعَنِ التَّابِعِينَ، وَمَنْ تَبِعَهُمْ بِإِحْسَانٍ إِلَى
يَوْمِ الدِّينِ، وَعَنَّا مَعَهُمْ بِعَفْوِكَ وَكَرَمِكَ وَإِحْسَانِكَ يَا أَرْحَمَ الرَّاحِمِينَ.

SIDANG JEMAAH YANG DIRAHMATI ALLAH,

Khatib juga mengambil kesempatan ini untuk menyeru para jemaah sekalian agar terus memberikan sokongan padu tanpa berbelah-bagi kepada penduduk Palestin yang sedang dizalimi oleh Regim Zionis melalui serangan tanpa henti di Gaza dan Tebing Barat.

Kita mungkin tidak mampu mengangkat senjata, tetapi kita masih mempunyai kekuatan daripada aspek kewangan. Infakkanlah sebahagian



rezeki untuk membantu mereka yang ketika ini berada dalam keadaan yang amat menyedihkan serta menjalani kehidupan yang sukar. Selain itu, gunakanlah senjata paling ampuh yakni DOA. Semoga Allah **سُبْحَانَهُ وَتَعَالَى** menganugerahkan kejayaan, keselamatan dan kesejahteraan buat seluruh umat Islam serta rakyat Palestin khususnya. Semoga bumi Palestin kembali aman dan makmur di bawah rahmat Allah **سُبْحَانَهُ وَتَعَالَى**.

اللَّهُمَّ اغْفِرْ لِلْمُسْلِمِينَ وَالْمُسْلِمَاتِ وَالْمُؤْمِنِينَ وَالْمُؤْمِنَاتِ الْأَحْيَاءِ مِنْهُمْ وَالْأَمْوَاتِ،
اللَّهُمَّ آمِنَّا فِي أَوْطَانِنَا، وَأَصْلِحْ وَاحْفَظْ أَيْمَتَنَا وَعُلَمَاءَنَا وَوُزَرَائِنَا وَوُلَاةَ أُمُورِنَا.
اللَّهُمَّ وَفِّقْهُمْ لِمَا فِيهِ عِزُّ دِينِكَ وَنَصْرُ شَرِيعَتِكَ، اللَّهُمَّ اجْعَلْهُمْ هُدَاةً مُهْتَدِينَ
صَالِحِينَ مُصْلِحِينَ وَاشْمَلِ اللَّهُمَّ بِعِنَايَتِكَ وَتَوْفِيقِكَ عَلَى صَاحِبِ الْجَلَالَةِ،

Kebawah Duli Yang Maha Mulia Seri Paduka Baginda Yang di-Pertuan Agong, Al-Sultan Abdullah Ri'ayatuddin Al-Mustafa Billah Shah Ibni Almarhum Sultan Haji Ahmad Shah Al-Musta'in Billah dan Kebawah Duli Yang Maha Mulia Seri Paduka Baginda Raja Permaisuri Agong, Tunku Azizah Aminah Maimunah Iskandariah Binti Almarhum Al-Mutawakkil Alallah Sultan Iskandar Al-Haj;

وَكَذَلِكَ صَاحِبِ الْفَخَامَةِ،

Tuan Yang Terutama, Tun Dato' Seri Utama Ahmad Fuzi Bin Haji Abdul Razak, Yang di-Pertua Negeri Pulau Pinang.

اللَّهُمَّ ادْفَعْ عَنَّا الْبَلَاءَ وَالْوَبَاءَ وَالْعَلَاءَ وَالرِّيَاءَ، وَالرِّبَا وَالزَّنَا وَالزَّلَازِلَ وَالْمِحْنَ وَسُوءَ
الْفِتَنِ مَا ظَهَرَ مِنْهَا وَمَا بَطَّنَ عَنْ بَلَدِنَا هَذَا خَاصَّةً، وَعَنْ سَائِرِ بِلَادِ الْمُسْلِمِينَ عَامَّةً
يَا رَبَّ الْعَالَمِينَ.



Ya Allah! Dengan sifat-Mu yang Maha Pemurah dan Maha Mendengar, jadikanlah kami dan keturunan kami orang-orang yang istiqamah mendirikan solat secara berjemaah serta mengeluarkan zakat dan melaksanakan waqaf melalui agensi milik penuh Majlis Agama Islam Negeri Pulau Pinang (MAINPP) iaitu Zakat Pulau Pinang (ZPP) dan Wakaf Pulau Pinang (WPP).

Ya Allah! Berilah petunjuk-Mu kepada kami dan pemimpin-pemimpin kami untuk memberikan khidmat bakti yang terbaik kepada agama, bangsa dan negara. Ya Allah! Kuatkan iman kami agar dapat menghindari perbuatan khianat, salah guna kuasa dan harta, memberi atau menerima rasuah dan segala perbuatan durjana yang merosakkan kepentingan agama, masyarakat dan negara.

رَبَّنَا آتِنَا فِي الدُّنْيَا حَسَنَةً وَفِي الْآخِرَةِ حَسَنَةً وَقِنَا عَذَابَ النَّارِ.

عِبَادَ اللَّهِ! إِنَّ اللَّهَ يَأْمُرُ بِالْعَدْلِ وَالْإِحْسَنِ وَإِيتَايَ ذِي الْقُرْبَى وَيَنْهَى عَنِ الْفَحْشَاءِ وَالْمُنْكَرِ وَالْبَغْيِ يَعِظُكُمْ لَعَلَّكُمْ تَذَكَّرُونَ ﴿١٠﴾ فَادْكُرُوا اللَّهَ الْجَلِيلَ يَذْكُرْكُمْ، وَاشْكُرُوهُ عَلَى نِعَمِهِ يَزِدْكُمْ، وَلَذِكْرُ اللَّهِ أَكْبَرُ وَاللَّهُ يَعْلَمُ مَا تَصْنَعُونَ ﴿١١﴾